

Agong zahir kebimbangan tindakan provokasi kaum

Astro Awani

18 Mei 2020

Fauzi Suhaimi,

KUALA LUMPUR: Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah menzahirkan kebimbangan dengan polarisasi kaum yang masih wujud di negara ini.

Al-Sultan Abdullah bertitah, sebarang bentuk tindakan provokasi, selain fahaman serta nilai yang bertentangan dengan norma, adat dan undang-undang perlu dibendung sebelum merebak menjadi barah kepada kestabilan negara.

"Setiap kaum perlu menunjukkan sikap dan teladan yang jujur untuk mengeratkan hubungan.

"Dalam usaha mengukuhkan lagi kesepaduan sosial dan integrasi nasional, beta menyambut baik pelaksanaan Pelan Tindakan Perpaduan Negara bagi memastikan agenda perpaduan nasional dapat diterapkan secara menyeluruh menerusi elemen kepercayaan dan jati diri yang teguh berlandaskan kepada prinsip Rukun Negara," titah baginda.

Al-Sultan Abdullah bertitah demikian ketika merasmikan Mesyuarat Mesyuarat Pertama, Penggal Ketiga Parlimen Ke-14 di Dewan Rakyat, di sini pada Isnin.

Baginda turut bertitah, kedudukan Islam sebagai Agama Persekutuan seperti yang termaktub dalam Perlembagaan Persekutuan akan terus dipertahankan.

"Selaras dengan ajaran Islam yang syumul dan dipacu oleh prinsip maqasid syariah, beta mahu kerajaan mewujudkan pentadbiran agama Islam yang inklusif, progresif, membentuk hubungan etnik dan agama yang harmoni serta menyantuni kemanusiaan dan peradaban ke arah kesejahteraan sejagat.

"Pada masa sama, kerajaan akan terus mempertahankan hak penganut agama lain untuk terus bebas mengamalkan agama mereka secara berhemah dan aman," titah baginda.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/agong-zahir-kebimbangan-tindakan-provokasi-kaum-243410>